

Date – 03/11/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

1. Kumin thla 10 kal ta chhung khan Mizoram Police te'n ruihhlo chi hrang hrang Cheng vaibelchhe 188 leh Nuai 64 chuang man an man.
2. Supply Minister Pu B. Lalchhanzova'n mi Nuai 1 tan ration buhfai kg 1 Cheng 20-a khul theihna tur special ration package buatsaih mek a ni, a ti.
3. Diwali lawmna kal zelah Indian Railways chuan special train a tlantir mek.
4. Israel sipaiten boruak atanga Khan Younis an kahnaah Hamas hruaitu pawimawh, Izz al-Din Kassab a thi.

<><><>

POLICE DRUGS SEIZURE

Kumin thla 10 kal ta, January atanga October inkar khan Mizoram Police te'n ruihhlo chi hrang hrang Cheng vaibelchhe 188 leh Nuai 64 chuang man an man.

IGP (Law and Order) Pu Lalbiakthanga Khiangte hnen atanga Akashvani Aizawl-in thu a dawn dan chuan kumin thla 10 kal ta chhung khan ruihhlo kaihnnawihah thubuai 305 ziah luh a ni a, ruihhlo tawlh leh zawrh chungchanga inhnammawih mi 412 man an ni bawk. Police hian kumin chhung hian heroin an man tam hle a, kg 67 leh gram 82 manin Cheng vaibelchhe 20 leh nuai 34 man vel nia chhût a ni a. Heroin kaihnnawihah thubuai 256 ziah lutin mi 341 an man a ni. Methamphetamine kg 480 leh gram 884 an man a, chu chu cheng vaibelchhe 62 leh nuai 51 man nia chhût a ni a, a kaihnnawihah thubuai 23 ziah lutin mi 44 man an ni. Police-te hian crystal meth kg 35 leh gram 155 manin, Cheng vaibelchhe 105 leh Nuai 46 man nia chhût a ni a, a kaihnnawihah hian thubuai 4 ziah lutin mi 3 man an ni.

Hei bakah hian Police-te hian October thla khan tun hmaa hriat hlawh lo tak Caffein (anhydrous) quintal 1 leh kg. 75-a rit an man a; hei hi Cheng Nuai 15 leh Sing 6 man vel nia chhût a ni. Ruihhlo dang an man zingah tunlai thalaite'n an uar thar leh Ganja kg 294 leh gram 925 a tel a; hei hi Cheng Nuai 14, Sing 7 leh Sang 4 man a ni. Ruihhlo an man dangte chu Alprozolam leh khuh damdawi (codeine) te a ni a, khuh damdawi hi Cheng Nuai 1 chuang man a ni.

<><><>

MONITORING

Zirtawpni khan Mizoram State Project Monitoring Committee (MSPMC) chuan an Vice Chairman Pu R. L. Rinawma kaihhruiin Eklavya Model Residential School (EMRS) Tlangnuam-a sak mek an endik.

Tlangnuam EMRS-ah hian academic building leh pisa-te, mipa leh hmeichhe hostel, choka leh chaw eikhawmna hall, zirtirtute chenna in tur hlawm thum leh hnathawktu dangte chenna turte an endik a. Heng Building-te hi zawh fel vek la ni lo mah se kumin 2024-2025 academic session-ah hian pawl 6 leh pawl 7-ah te admission lain sorkar laipui EMRS Society thu angin zirna hi tan a ni a. Heng bulding endikah te hian thawm that ngai leh hna hmabak chhonzawm ngai eng emaw zat hmuh a ni a. A hmunah he hna thawh kawnga mawhphurtu sorkar thuneitu leh a hnathawktute MSPMC hian thil awmdan an sawipui nghal bawk a ni.

He hna hi Cheng Vaibelchhe Sawmhnih pathum chuang senga sak mek a ni a. Tunah hian za zela sawmkua pasarih vel zawh tawh a ni a.



SPECIAL RATION PACKAGE

Food, Civil Supplies & Consumer Affairs Minister Pu B. Lalchhanzova'n mi Nuai 1 tan kg 1 Cheng 20-a ration buhfai khul theihna tur special ration package buatsaih mek a ni, a ti.

Serchhip District Consumer Association buatsaih Serchhip khaw chung a za Eirawngbawl na Gas, mahnik kawkaia lak kalpui a nih lawmna hun Serchhip DC Pisapui Hall-a buatsaih a hmanpuinaah Supply Minister chuan, Ration card ennawn hna thawh mek a ni a, a buaipute lam atang chuan na deuh taka hma lak an tum thu sawiin Ration card varin buhfai kg 1 Cheng 30-a an leina tura a mawphurtu ber a nih thu a sawi baw. Card pawl leh card enga awm awm tak, mahse a awm thei chin bitukin a pelh tawh si avanga leng ta lo eng emaw zat an la awm tih sawiin mi Nuai 1 te tan kg 1 Cheng 20-a ration buhfai an khul theihna tur special ration package buatsaih a ni a, hemi atan hian Ration Card Sen hman a ni dawn tih a sawi baw.

(Corr)



POOR ROAD CONDITIONS

Lunglei Thalai Pawl chuan Lunglei leh Tlabung inkar NH 302 kawngpui chhe lutuk chungchangah NHIDCL hnuai Contractor laka lungawi lohna lantir an tum.

An pawl President Pu Lalduhawma'n nimin khan chanchinbumite kawmin he kawngpui chhe lutuk vang hian harsatna tam tak a thleng tawh tih sawiin, Pawl hrang hrang pawhin he kawng siam mek hi an vil thin a, mahse hmasawna hmuh tur a awm lova, kawng siamtute hian tihtakzetin he kawng siam that hi an vei lo a ni, a ti.

Thuchhuah siamin Lunglei Thalai Pawl chuan Phairuang Lei leh Tuichawng Lei phei chu siamtha tura hmalak miah loh angin vawiin thlengin a la awm niin an sawi a. Hei bakah hian Hrangchalkawn, Theiriat, Luangmual, Lunglawn leh Sazaikawn huam chin phei chu kutthlak a tlem hle a, NHIDCL leh BRN Company hian inthlahdah takin a remchang apiang hnathawk tur pawt khawmin an namnul mai mai nia an hriat thu an sawi.

Lunglei Thalai Pawl hian Aizawl-Thenzawl-Lunglei kawngpui chhe lutuk pawh veiin, sorkarin Cheng vaibelchhe 3 leh Nuai 6 a dah chu High Court-ah PIL an theh lut a, High Court chuan PIL hi ngai pawimawhin kumin October ni 30 khan Mizoram sorkar chu kawng siam dan thlalak leh Affidavit siama theh lut turin a hriattir tih an sawi a ni.

(Thanghmingliana Renthlei, PTC Lunglei)



HEALTH CARE

Mizoram Sorkarin health care scheme thar Mizoram Universal Health Care Scheme, August 2024-a tlangzarh hman tura a beisei chu a taka kalpui a la ni lo.

Mizoram State Health Care Scheme policy kal lai mek hnuaiah inziahlul hun hawn a ni leh dawn thung. Sorkar thuchhuahin a tarlan dan chuan mipui harsatna sutkian nan Health Care Scheme hnuaia inziahlul hun hi tun thla November ni 30 thleng hawn a ni dawn a, thla 6 chhung, kumin October atanga March 2025 thleng a dam ang. Chhungkaw khatin thla 6 chhung atan Cheng Nuai 1 thleng a bill theih ang. October ni 1, chin hnu lama damdawi Ina admit ten he enrolment thar hi Health Care hnuaia bill nan hman tur a ni.

Mizoram State Health Care Scheme (MSHCS) hnuaia inziak lut tur hian chhungkaw member bituk zat a awm lova, ration card Eng tan inziahlul man Cheng 100 niin card pawl tan Cheng 500 a ni a, Card Var tan inziahlul man Cheng 1,000 niin Ration card nei lo tan pawh inziahlul theih tho a nih thu tarlan a ni.

(CORR)



ASF

Nimin khan African Swine Fever (ASF) vawk pulhri vangin vawk 2 a thi a, vawk thite hi Hnahthial district-a Khawhri khua ami te a ni.

Heti hian kumin February ni 9-a Champhai District Leithum khuaa ASF vawk pul hri vanga vawk thi hmuhchhuah a nih atanga kumin chhunga he vawk pulhri leng vanga vawk thi tawh zat chu 14,358 a tling tawh a. Tun dinhmunah hian khaw 252 chu ASF vawk pulhri lenna khuaa puan mek a ni. Niminah khan vawk damlo 12 chu Lunglei district-a khaw pahnihah talh a ni a, Tlabung khua-ah 7 talh niin Ramthar vengah 5 talh a ni. Hemi tiam hian kumin chhunga vawk damlo talh tawh zawng zawng chu 23,808 a tling tawh a ni.

(Desk)



ALL SOULS DAY

Nimin, thlarau khawvel chhuahsan tawhte puala hun hman ni, 'All Souls Day' kha khawvel ram dang amite rualin Mizorama Catholic Kohhran chuan urhsun takin an hmang.

Tualchhung Kohhran Cathedral leh Parish hrang hrangah nimin zing khan Holy Mass hlanin an inkhawm a; thlanmuala inkhawm leh thlan malsawmna hun atana hmang an awm bawk. Thihna avang leh thil danga harsatna bik neite chuan nimin leh vawiina thlan malsawmna tlai dar 3 atanga hman tur hi thulhin, hun remchang hmasa-ah an buatsaih ang.

Tualchhung Kohhran engemaw zat chuan nizan khan thlarau kaltate pualin inkhawm an buatsaih bawk.

(Desk)



DIWALI

Diwali lawmna kal zelah Indian Railways chuan special train a tlantir mek a. Vawiin hian festival special train 20 vel chu Delhi-NCR aṭangin ram chung hmun hrang hrangah a chhuak dawn a, chung zingah chuan Darbhanga, Ranchi, Patna, Katra, Muzaffarpur, Ballia, Kamakhya, leh Azamgarh panna tur special train te pawh a tel a ni.

Sri Lanka-ah pawh Indian Cultural Association leh High Commission of India-te'n Diwali lawmna atana culture programme an buatsaih chu hman chhunzawm zel a ni a. He hunah hian Sri Lanka-a India High Commissioner Santosh Jha, Indian diaspora member leh India ram amite an tel a, Sri Lanka leh India state hrang hrang aṭangin hnam lâm bakah fashion show neih a ni.

(News on air)



WEST ASIA CRISIS

Israel sipaiten boruak atanga Khan Younis an kahnaah Hamas hruaitu pawimawh, Izz al-Din Kassab a thi niin Israel-in a sawi. Kassab-a hi hel pawl dangte nena Gaza Strip-a pawikhawiha chetnaa inhnamhnawih thin, Hamas hruaitu pawimawh la dam awm chhun a ni.

Hamas pawhin Kassab-a thih thu hi nemnghetin Israel-in an chuanna lirthei an kahnaah Hamas hruaitu dang, Ayman Ayesh-a nen an thi tih thuchhuah siamin an tarlang a, Kassab-a hi Gaza bialah hruaitu pawimawh ni mah se Hamas political office-ah erawh nihna a nei lo nia sawi a ni.

(NSD)

